



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 6

Yangia anidakangma :

f Tir Yimyim

ig tiryimyim@aolima

yt tir yimyim

TAPAK 7

Meghalaya CM-i Tipra Motha rally nung adentsü

Claudia Goldin nem Nobel Prize in Economics Award agütsü



VOL. XXI NO. 03 (ADOK 03) DIMAPUR

SANGTENNÜ (TUESDAY)

MONGPUTENI (OCTOBER) 10, 2023

₹ 5.00

## Nov 7 nü Tapi constituency by-election agitsü

**Dimapur, October 9, 2023 (TYO):** Election Commission of India (ECI)-i Hombarnü Nagaland kübok 43-Tapi (ST) constituency by-election agitsü osang metetdaksüogo.

Taküm August ita Tapi constituency nungi MLA Noke Wangnao asüba sülen menden tazüing aküm aser iba atema November 7, 2023 nü by-election agitsü ta ECI-i ashi.

Iba atema October 13 nü gazette notification agütsütsü aser October 20, 2023 tashi nung nominations asütsü. Maneni, October 23, 2023 tashi nung candidate temi tenüing meyipa agitsü akok.

43-Tapi (ST) constituency by-election nung ECI-i polling stations ajak nung EVMs aser VVPATs amshitsü lemtetogo. Iba atema EVMs aser VVPATs peria yokogo aser item teyari ajanga polling tiptema agitsü atema maparen renemogo, ta ECI-isa metetdaksü.

Vote enoktsür jangjatsü atema tongtipangba kulikaketji Electoral Photo Identity Card

(EPIC) asütsü saka government-approved identity cards amshitsü akok, ta parnokisa ashi.

43-Tapi (ST) Assembly Constituency by-election indang osang sangdongba nungi Mon district nung Model Code of Conduct mapa tenzüksü aser iba nung candidate, political party, state sorkar aser Centre sorkar ajak adentsü.

\* Date of Issue of Gazette Notification : 13th October, 2023 (Friday)

\* Last Date of making Nominations : 20th October, 2023 (Friday)

\* Date for Scrutiny of Nominations : 21st October, 2023 (Saturday)

\* Last Date for Withdrawal of candidatures : 23rd October, 2023 (Monday)

\* Date of Poll : 7 November, 2023 (Tuesday)

\* Date of Counting : 3rd December, 2023 (Sunday)

\* Date before which election shall be completed : 5th December, 2023 (Tuesday)

## Dimapur nung World Post Day mongogo

**Dimapur, October 9, 2023 (TYO):** Alima den külemi Department of Posts NE-II Circle (Nagaland & Manipur) ajanga World Post Day mongogo. Iba sentong ya Dimapur Posts office nung agi.

“Department of Posts-i kümshia World Post Day (October 9) nungi tenzüka National Postal Week amonger. Iba ya Universal Postal Union tentetba anogomong lir” ta Postmaster General, NE-II region, Som Kamei-i ashi.

World Post Day tenüing nung Department of Posts Nagaland division nungi ketdangsur pezü nem sempet agütsü.

Parnok ya Postal Assistant, Kohima Kekhriezeto Solo, Postman, Dimapur bazaar YK Magar, Postman, Chumoukedima Simon Zeliang aser Branch Postal Master, Pungro M Khentsumew nung lir. Parnoki kanga dang nendaka mapa tajung inyakba atema tenüingsang agütsü.

Manipur nung tensa majungba ajanga ketdangsurtem shinga iba sentong nung medentet, ta Som Kamei-i ashi.

National Postal Week mapang Department of Posts-i October 10 nungi 13 tashi Pfutsero, Mokokchung, Kohima aser Dimapur nung sentong balala ayonga agitsü.

## Army-i Assam nung AFSPA agiennür

**Guwahati, October 9, 2023 (Agencies):** Indian Army-i Assam ajungalen nungi Armed Forces Special Powers Act (AFSPA) agientsü mepishiogo ta Chief Minister Himanta Biswa Sarma-i ashi.

Assam nung lendong kecha mali anungji AFSPA agientsü Army-i ajanga asadangtetogo ta CM Sarma-i ashi.

“Onoki district 8 nungi AFSPA agientsü shidang aser India sorkari district 4 nungi agien. Dima Hasao, Karbi Anglong, Golaghat aser Jorhat district tem nungi AFSPA agienogo” ta pai ashi.

Maneni, India sorkari taruba

Centre sorkari shilem lemsar inyaksü ashi aser iba amaji Assam-i inyaker. Ajisüaka Centre sorkari district pezü nung parnoki nüka linür, ta paisa shisem.

Hombarnü Guwahati nung aliba Narengi Military Station nung General Lachit Borphan indang kürakyanglu ka sayatsüdang CM Sarma-i iba osang lemsatet.

**Aizawl, October 9, 2023 (Agencies):** Election Commission of India (ECI)-i state punga nung assembly election agitsü anogotem metetdaksüogo.

Mizoram nung November 7 nü election agitsü aser state punguprong nung December 3 nü votes azüingtsü ta Chief Election Commissioner Rajiv Kumar-i ashi.

Madhya Pradesh nung November 17, Rajasthan nung November 23, Telangana nung November 30 aser Chhattisgarh nung shilem ana lemsar November 7 o 17 anogotem polling asütsü, ta CEC Rajiv Kumar-i ashi.

Züingsem 40 agi akümba Mizoram assembly kümsük December 17 nü tembangtsü. Mizoram nung tang Chief Minister Zoramthanga lenisüba

kübok Mizo National Front (MNF) sorkar kümteta lir.

Mizoram nung polling stations 1,276 aliba nungi 525 urban areas aser 751 rural areas nung lir. Iba nungi tetsürtemi polling booths 95 ketdangtsüa repranger.

Mizoram nung polling booths 638 nung webcasting lir aser iba ya polling booths tesadang ka lir.

Mizoram nung vote enoktsür nisung lakh 8.52 lir aser iba nung tebur lakh 4.13 aser tetsür lakh 4.39 lir. Taküm election nung nisung 50,611-i mezüing atema vote enoktsütsü ta Election Commission of India (ECI)-i metetdaksüogo.

Mizoram state assembly nung MNF MLA 28 aser main opposition Zoram People's Movement (ZPM) MLA 6 lir. Külen, Congress MLA 5 aser BJP MLA ka dang lir.

**State punga nung poling anogotem:**

Mizoram - November 7  
Chhattisgarh - November 7 & 17  
Madhya Pradesh - November 17  
Rajasthan - November 23  
Telangana - November 30

**Deobar anogo votes mazüingtsüla: MPCC**

Tanü Mizoram Pradesh Congress Committee (MPCC)-i ECI dang votes azüingtsü anogo melenshitsü atema ayongzüko.

“December 3 ya Deobar anogo lir. Mizoram nung alirtem asoshi Deobar ya temeshi anogo lir aser iba anogo Tsüingrem külema amonger” ta Congress president Lalsawta-i Chief Election Commissioner Rajiv Kumar dangi shidi ka zülüogo.

Deobarnü official sentong mesüra maparen kecha meinyaker, ta Lalsawta-ashi.

## NIPF-i non indigenous nisung ka GB shimba ashishir

**Dimapur, October 9, 2023 (TYO):** Nagaland nung non indigenous nisung ka GB inyaksü shimba osang angashia kanga aoksar ta Nagaland Indigenous People's Forum (NIPF)-i metetdaksüogo.

Iba ya tebilemtsü ulura lir aser tarutsü nung Nagaland nung lisopurtem asoshi lendong bentsür arutsü akok. Anungji Nagaland sorkari tesüiba nung

non indigenous nisungtem GB shima aliba repringdangtsüla mesüra tarutsü nung ibala nisung meshimtsü atema inyakyim lateta ayutsüla ta Media Cell, NIPF-i sangdong ka nung metetdaksü.

NE State kar nung non indigenous nisungtemi sorkar ketdangsubaren nung lisopur madak yimsü asür. Pei state nung lisopurtem telok tilaba kümogo, anungji sorkar

ketdangsur kari danga Nagaland sorkar office aser rejutem nung non indigenous nisungtem shimokba putetra ozüing tesashi agi merenshitsüla ta parnokisa ashi.

Nagaland nung lisopur ajak kümdanga alitsüla aser kin mesüra telok telemsa kecha melii lisopurtem kümsüka ayutsü atema mapa inyaksü ayongzüker ta NIPF-isa ashi.

## AKM-i Asür Sb.Imnayachet bilemteta sentong ka agiogo



AKM office kima nung Asür Sb.Imnayachet Mollier nem tetushi agütsüba sentong ka agiba angur.

**Mokokchung, Mongputeni/October 9 (TYO):** October 4 nü Ao Kaketshir Mungdang(AKM) nung Social & Culture Secretary inyaka alisang Asür Sb.Imnayachet Mollier gari lendong nung asüba bilemteta Hombar aonung AKM-i Candlelight Service ka ayongzüka agiogo.

“2023 March 18 nü AKM ketdang asütsü asoshi tetoktsür ketdangpur ket nungi khuret agizüker kelen AKM maparen balala inyaka arudang asür külem tenzüker Imnayachet ya mapa agi kodanga malakba taküm ka aser kanga dang shisa taka nüba ka asü, aji asünung onok rongnung pa maliba ajanga tapok tuluka apar” ta AKM Tir Lanutoshi Aier-i AKM office kima nung agiba sentong nung

jembidang ashi.

AKM tenüing nung Naga nung lokti balala nung shilem agia jajadang tangar kini Imnayachet dak kanga dang temulung chia apayua nüksüha aliba taküm ka liasü ta AKM Tir-isa lemsatet.

Tang tetenzükdak AKM ketdangpurtem shisa kanga dang ajema liasü aser maparen ajak nung kasa tangatetba nung inyaka arudang parnok rongnung asür takum ya ajanga shilem tuluba agia liasü ta AKM Tir-isa metetdaksü.

Asür Imnayachet Mollier tata mendenji Social & Culture Secretary ka dang liasü ta bilemtsüa akok saka iba menden ya AKM asoshi tongti menden ka lir aser tanü pa maliba asoshi

sensena bilemerta AKM Tir-isa tesasaba olen ka shisem.

Iba sentong nung Asso. Pastor MTBA Rev. Temsüwati-i Tsüingrem o ajanga tesentepertem ayongzüker, temo milen tsükloker asür nem tetushi agütsüba mapang agi aser sentong nung Tsüingrem leniba jazüka Watsü Mungdang Tir Arenla Lkr-i sarasadem.

AKM Tatong Tir Sb. Onenpong ketdangsuba nung iba sentong agiba den teloki külemi sarasadema iba sentong tembang.

Sentong nung Ao Senden aser Watsü Mungdang nungi lenirtem, AKM nung Sanen Luden, tejen tenzükertertem aser Kaketshir aika adenshia kanga dang meraketa agia liasü.

### Lanurtem election nung shilem agitsü ajungmesoba sentong agi



Deputy Commissioner & District Election Officer Tseminyu, Dr. Tinojongshi Chang den Youth Voters Festival nung shilem agir lanurtem külemi tangokba noksa ka yangi angur.

**Dimapur, Mongputeni/Oct. 09 (TYO):** Taruba elections nung lanurtem shilem agidaktsütsü ajungmesoba aser talisa 2024 küm photo electoral roll indang summary revision aser Lok Sabha election nung shilem agitsü asoshi "Your Vote, Your Voice" omen kübok Youth Voters Festival ayongzüka liasü. Iba sentong ya Tseminyu Town nung October 9, 2023 nü agia liasü.

Iba sentong nung Tseminyu district kübok government aser private school tem nungi Class VIII nungi tema kaketshirtem tejangraba tulu nung arua

detoktepa balala nung shilem agia liasü. Iba sentong nung Classes 8, 9 aser 10 kaketshir temi Best Presentation on Naga Traditional Attire nung shilem agia liasü aser Classes 11 aser 12 aser temapuri "Your Vote, Your Voice" omen nung sangro züngtepa liasü.

Iba benjongmung ya ajanga kaketshirtem pei sempet, shisatsü sayutsü aser Naga nung sobaliba angazüksü maongka agütsü aser kasa mapang democratic lima nung vote agütsüba koda tongtipang ta asüba indang angazükdakja liasü.

Iba sentong nung Runohile Keppen, SVEEP Campus Ambassador, aser Christine Tsela, SVEEP District Icon nati Girls' Campaign 2023 nung shilem agir tetsürtem nem tetushi agüja liasü, koba Beti Bachao Beti Padhao sentong kübok liasü.

Iba yagi tetsürtem election inyakyim densema takum nung lenla balala nung shilem agitsü ajungshia liasü.

Iba sentong nung menden ya Ruokuosetuo Tetso, EAC (Hq) Tseminyu liasü aser Kemciyile, NCS, SDO (Civil) Tseminyu ajanga melepzüing o jembi.

### FTII ajanga anogo ter Screen Acting training agütsütsü

**Dimapur, Mongputeni/Oct. 09 (TYO):** Film and Television Institute of India (FTII), Pune ajanga Department of Information & Public Relations den lungjemer Nagaland nung aliba ST pur nem anogo ter Screen Acting indang training agütsütsü, koba October 30 nungi November 10, 2023 tashi alitsü.

Iba training mapang Movement of Actors, Improvisation, Voice/ Speech/ Diction, Monologue, Physical Culture, Sense memory and Imagination, Observation and Character Study, Technical Aspects of Screen Acting amala onük tem awajemtsü. Iba training nung shisalen

sayur ya Anita Salim alitsü, shiba FTII, Pune indang alumnus lir. Lai jilushi balala nung shilem agiogo aser 1984 nungi tenzüka kaketshir, 'amateurs' aser professionals tem nem workshop balala agüja arur. The Phoenix Players ya la densemer tenzü, kong la ya actor, mentor aser producer lir.

Salim yagi costume design ketdang süogo, mime, tsüngsang aser otsü ashiba mapa inyakdanga lir. 1992 nungi tenzüka Prithvi Summertime Theatre for Children nung la inyaka arur aser online ajanga mezüing training agütsüdang la shisalen sayur liasü. Iba training ya Directorate

of Information & Public Relations, Kohima agitsü aser shilem agirtem ya Scheduled Tribe nungi asütsüla aser arishi küm 18 tema asütsüla.

Iba training atema course fee malitsü aser shilem shir temi registration mapang sen 1,000 agütsütsüla.

Tejangrar temi pei indang osang tejangja den ST Certificate iprnagaland@gmail.com dangi yoktsüla mesüra 88611 60084 den jembitsü akok.

Form agütsütsü asoshi October 25, 2023 ya tatem asütsü. Iba training tembangba sülen FTII ajanga kulizüing kaket agütsütsü.

### Mokokchung nung Soil Health Cards aser Micronutrients lema agütsü



**Dimapur, Mongputeni/Oct. 09 (TYO):** Department of Soil and Water Conservation, Mokokchung ajanga Mokokchung district kübok yimtsüing balala nungi aluyimer nem October 6, 7 & 8, 2023 anogotem nung Soil Health Card (SHC) aser Micronutrients lema agüja liasü.

Iba sentong ya Ministry of Agriculture and Farmer's Welfare, Government of India indang RKVY nung aliba SHC scheme kübok ayongzüka liasü.

Aluyimer indang alu nungi ali bendena temu ali-mali tendang aser micronutrients tem lema agüja liasü, ta osang ka ajanga ashi.

Ali temu tendangba report timba nung micro nutrients agi anünga aliba jangjatet aser alu nungi aonsotsü aser tsük tali züsentetba nung tetsükdaktsü agütsür.

Tang tashinung Mokokchung district kübok 2020-21 mapang yimtsüing toku nem SHC aser Micronutrients 2092 lema agütsüogo.

Maneni 2022-23 mapang yimtsüing toku nem SHC aser Micronutrients 1800 agütsüogo aser ano 2023-24 nunga yimtsüing toku nem SHC aser Micronutrients lema agütsütsü sentong lir.

Micronutrients table spoon ka asoshi tzü litre ka asütsüla aser ibaji 'soil drenching,' 'drip irrigation mesüra foliar spray' nung anogo 15 sülen khen akhar.

Micronutrients ya organic lir aser yangji Boron, Manganese, Iron, Copper, Zinc & Molybdenum lir.

### Mokokchung Circle Ao Officers Telongjem lokti senden ayonger

**Dimapur, Mongputeni/Oct. 09 (TYO):** Mokokchung Circle Ao Officers Telongjem (MCAOT), Seasonal Secretary, Er. Temsuwati Ao ajanga sangdong ka nung ashiba agi, Mokokchung Circle Ao Officers (Class II & above) Telongjem lokti senden October 14, 2023 anepdang 10:00 ako

nungi tenzüka Fazl Ali College, Conference Hall nung alitsü. Anungji iba senden nung züngsem ajam medema arua adentsü ayongzüker. Agenda kar lira, WhatsApp number 9436006284 nung October 12, 2023 tashinung lemsateptsü akok, ta sangdong ajangasa ashi.

### Hornbill Festival 2023 renemshiba atema senden ayonger

**Dimapur, Mongputeni/Oct. 09 (TYO):** Hornbill Festival 2023 asoshi renemshia aliba aser road map dak sendakba nung Chief Secretary, Nagaland ajanga sendaktepa aliba department ajunga den senden ka amentsü

ayongzüka lir. Iba senden ya Secretariat Conference Hall, Kohima nung October 13, 2023 nikongdang 3:00 ako nungi amentsü aser iba senden nung nungdabapur ajunga medema adentsü metetdaktsüogo.

### Niuland nung School Painting Competition alitsü

**Dimapur, Mongputeni/Oct. 09 (TYO):** International Day of Girl Child aser Beti Bachao Beti Padhao campaign kübok Deputy Commissioner, Niuland indang Conference Hall nung October 11, 2023 anüngdang 11:00 ako nungi tenzüka painting competition alitsü, ta Deputy Commissioner, Niuland, Sara S

Jamir-i sangdong ka nung ashi. Iba tetoktepa indang omen ya "Women Empowerment" alitsü. Iba tetoktepa nung Reginald Hughes Shaw school, Shepherd High school, Modern High school, St Joseph school aser Govt. Higher Secondary school nungi shilem agitsü ajungshir, ta sangdong ajanga ashi.

### National Integration Tour sentong tembangogo



**Dimapur, Mongputeni/Oct. 09 (TYO):** Gujarat state kübok Ahmedabad semdangtsü asoshi Nagaland nungi kaketshirtem National Integration Tour aoba tongti tesemdanger Major General Vikas Lakhera, Sena Medal, Inspector General of Assam Rifles (North) ajanga Ghaspani nung October 9, 2023 nü tembangtsüogo.

Iba tour ya Assam Rifles temi ayongzüka liasü, kong Modern College, Piphema nungi kaketshir 18 (tetsür toku aser tebur toku) den professor anati shilem agia liasü. Anogo ter iba tour ya September 28, 2023 nü Ghaspani nungi tenzüka liasü.

Nagaland nungi kaketshirtem nem Gujarat state nung shisaliok aser industrial institution balala reprangdaktsütsü aser ajaklen terenlok kadaktsütsü nukjidong nung iba tour ya ayongzüka liasü.

Iba tour nung parnoki Statue of Unity, National War Memorial, Sabarmati Ashram, ISRO Space Centre, Science City aser Indian Institute of Management (IIM), Ahmedabad ama tongtipang tesemtem semdanga liasü.

Iba tour shibangtsüba sentong nung tongti tesemdangeri jembidang North East aser talisa Nagaland nung aliba nüburtem tarutsü jenjang ajungtsü asoshi Assam Rifles temi bendanga agütsür inyakba indang ashi aser iba tour nung ajangshibatem aser angazükbatem ajanga kaketshir takum aser Nagaland state asoshi temelenshi tajung bener arutsü imlar, ta shia liasü.

Iba sentong nung college aser school balala nungi kaketshir aser tongtipang nisungtem dena liasü aser Assam Rifles temi mapa tajung inyakba tepela lemsatepa liasü.



Assam Rifles temi "Peace & Prosperity Campaign" kübok senden ka October 9, 2023 nü Chenloisho, Mon nung ayongzüka mena liasü. Iba senden nung yangji alir nisung 23 den GBs, Chairman, VDB president, VGs, CSO aser Nagaland Police nungi teshimtet nisungtem dena liasü.



Ayushman Bharat Digital Mission ajanga, onoki shiranger ajak nem mapang shidak nung aser kecha tetsükdaktsü makai health facilities tajung agütsütsü atema inyaker

- Narendra Modi, Prime Minister



# Jan Jan Ki Swasthya Sevaon Ki Digital Udaan Ayushman Bharat Digital Mission (ABDM) Ke Saath



## Nü indang Digital Health Account agiang Ayushman Bharat Health Account (ABHA)



### Mashie Mapang, Mashie tesem nung Health Records

Digital store ajanga rizüngtsü, reprangtetsü aser nü health records nungdakba mapang ajak nung lemsateptetsü



### Melamela Teyari Agiang

Register süa aliba health providers nungi melamela services agiang



### Tarensena Menokdaktsü

Online ajanga appointment agiang aser tarensen nung menokdaki OPD facility semdangang



### Teleconsultation

Healthcare mongintem tejangja den teleconsultation agiang

### ABHA Alizüngtem



ABHA Holders **crore 46**



Digital ajanga health records sendaktepba **Crore 31**



Verified Health Facilities **Lakh 2**



Nisung **Lakh 98-i** tanerensena menokdaki ABHA ajanga OPD registration agitet

CBC 17180/150001/23-24

**To create ABHA**



Log on to [abha.abdm.gov.in](https://abha.abdm.gov.in)



ABHA App download asütsü atema QR Code scan süang



For more information [abdm.gov.in](https://abdm.gov.in) | 14477 Follow us @AyushmanNHA

## November 7 nungi tenzüka state 5 nung assembly election agitsü: EC

New Delhi, October 09 (Agencies): Hombarnü Election Commission of India (ECI)-i Madhya Pradesh, Rajasthan, Chhattisgarh, Telangana aser Mizoram state tem nung assembly election agitsü anogotem sangdongogo.

Osangbenertem senden ka nung ECI-i, November 7 nungi tenzüka November 30 tashi nung

state pongu nung assembly elections agitsü, ta metetdaktsü. Mizoram nung tama November 7 nü election agitsü. Chhattisgarh nungbo shilem ana lemsar November 7 aser November 17 anogotem nung election agitsü. Madhya Pradesh nung November 23 nü election agitsü aser tesüsa Telangana nung

November 30 nü election agitsü. State ajak nung December 3 nü vote azüngtsü. Telangana, Rajasthan, Chhattisgarh aser Rajasthan state tem nung legislative assemblies kümsük sangküm January ita nung anogo balala nung tembangtsü. New Delhi nung osangbenertem den jembidang

Chief Election Commissioner, Rajiv Kumar-i, election junga agitettsü atema EC-i yimtenren party balala aser enforcement agencies densema stakeholders ajak ajurudar, ta metetdaktsü. State pongu nung voters crore 16 jungnüai vote agütsütsü. Item states nung polling station lakh 1.77 alitsü aser polling booth lakh 1.01

nungbo webcasting facility alitsü. Mizoram nung nominations atema tatembangbuba anogoji October 20 asütsü, tenüng agientsü atema tatembangbuba anogoji October 23 asütsü, November 7 nü election agitsü aser December 3 nü vote azüngtsü.

(Maneni tapak 8 nung...)



## TIR YIMYIM YIMOBILEM (EDITORIAL)

DIMAPUR SANGTENNÜ, MONGPUTENI (OCTOBER) 10, 2023

### Hamis ya shirnok ?

**A**rab oshi nung Hamas tetezü tashi tulu aser tasü tait. Iba telok yagi Israel lima meshimeshia makdoker Muslim lima ka kümner. Ibayongji, taoba mapang Yasser Arafat-i aniba Palestine nunger yimten nüchiso bushir telok Palestine Liberation Organisation (PLO) aser Israel na tsüngda yimjung yangluba mapatem ajak aitsür aser Israel lima ya alima nung mali kümstsüsbajiang parnok nukjidong lir. Atangji, Palestine nungsa asüyonga Gaza Strip nungbo Hamas telok yagi yimsü asür. PLO ama telok yagibo Israel limajia alitsüla ta asüba nung angateta liasü, saka Hamas telok tangatetbaji yamaji masü. Atangji, 1967 küm Egypt aser Syria nunger külen aser Israel nunger külen ta ser anogo trok raraba tongpang nung Israel-i takok angu aser Gaza aser West Bank ajak agia adok. Iba mapangbo item tesemtemji Egypt nunger kübok liasü. Ajisüaka, tesülen 2005 küm alima kintemi anung marem Gaza nung senso kümer liasüba Israel nunger 9000 den Israel sepaitemi Gaza toktsü aser aser Palestine nem agütsü aser yangji 2007 küm nungi tangar telok ajak aridoker Hamas teloki dang yimsü asür. Iba telok yagi Israel kin samatsütsü meranger asünungji, Israel nungertemi 2007 küm nungi Gaza Strip nung alirtem ya alilena aser tzüim aser anünglen nungia mejentetsüsa longpanger anüker, anungji Gaza nung alir Palestine nung alirtem ya tangaleni mouteti timtem kanga angur. Atangji, Israel nungertemi Gaza nung alirtem yamaji kechalenia moutetsüsa longpanger nokdanga ayubaji UN kübok Human Rights telok aser Red Cross purtemia aitsür. Hamas telok ya Palestine nung dang masü saka alima ajunga nung Muslim nungertemi yimsü asütsüla ta amangba telok, Muslim Brotherhood telok nung kongsang ka liasü aser 1987 küm Israel nungertemi Gaza aser West Bank na atsünga agiba anema raraba mapang iba telok ya tentet. Atangji, parnoki yimsü asür asünungji, Hamas telok yagi Gaza nung alirtem nembo education aser medical tsütsü nungdakba ajak nübortem nem agüja anepalur. Gaza nung ya nütsüng yongsük million ana shi lir aser item rongnung tesadang kabo arishi küm 19 teküpbok tanurtem lir. Tetezü tanur kanga asor aser tain kanga asür. US,UK aser Canada ama limatemibo Hamas ya alima nung yimten telok masü saka kiralongrar telok ta tetshir. Ajisüaka, ano külen Muslim limatem, talisa, Iran amaibo Hamas ya par kin aser nübortem asoshi nüchiso bushir telok ta agizüker. Atangji, alima nung kasa telok kaji kar atema nüchiso bushir asütsüa akok saka ano kasa telokji kar atemabo kiralongrar asütsüa akok. Aji oda, asenok rongnunga karibo tang Isreal nunger aliba lima ya Palestine nunger lima ta ashitsüa akok. Itemji, asenok Khristan-tem asoshibo Laishiba nung aliba tejen otsütem lir aser tatem nungbo alima rara tatembangbajia Israel aser Palestine lima lenji raratsü shinzüka tokja lir. Atangji, kasa telok süaka kar atema nüchiso bushir aser kar atemabo kiralongrar ta asübaji pei pei angatetba nung shitaka ta nokdaka lir. Ajisüaka, nüchiso bushirtem o kiralongrarterem na mapaji ajitet-ajiteta tetsüngda talangka ittepa lir. Atangji, Israel nungertemi Gaza aser West Bank len alir Palestine nungertem anema inyakba mapang mapang shia angashir, kechiyong parnok artsülenji teti petsaperong adoker. Ajisüaka, shingaia meimlaika tan Honibar nü October 7 anepdang Hamas teloki anünglen, alilen aser tzüyimlen ajak len nungi Israel nunger sepaitem anema dang masü saka kima yimdong aser kilong tashi karpoka tuagi tai maketba tetsür tanurtem dena tsübudakja kangshiba aser tepsetba mapatemji, tanü putu nungbo, nüchiso bushir nokinketer mapa masütsü. Item ajakji yutsür alima kintem rongnung itdangitaba mapa nung techira aser tongpang rara nung kin ajaki tsüba aliba Israel kin ama ka, Hamas ama telok tilakati artsü ajak nungpoka aita amaktsüsa aliba tijji Israel nungertem asoshi tang aser teti atema tansütsü mapa ka asütsü. Atangji, takoksabo Hamas teloksa tuluba akoksatsü saka Israel nungertemi par tetsü tebou Abraham, Isak aser Yakob Tsüngrem mepeladaktsüra, akhi tejen putu nung ama kasa Yihova Tsüngremi parnokji tangar tsükchir telok tilaba nem amokmerendaktsütsü.

## OLEMSABANG

### Tatemsabuba rara

~ Odi Jamir, Longbok Lemtur & S. T. Yapang Lkr

ABAM 1986 lemtet dak sentakba nung telok aser neja balalai züluba aser jembiba asenoki angashidar/züngdar, telok rongnung tilaba tuluba ta mali ajak kasa, par telok kotika ulu, yamaji onoka kasa aser ner teloka kasa. 1986 Lemtetba ya telemta ka ama karibo jembidar/züludar, ABAM nung tenzükertemi item pur dak tsüngbang kar koya majem kazür ama temulung lemer kazür asü ta bilema repranger, onoki bilembaji tai asütsü akok, ajisüaka ki arungnübo tsüngbang tesatempa aser tammangtiba ka nung jenoka liaka jenbuttsü lenmang mali. Tanü yabo ABAM nung tenzükertemi kuli kecha magütsür, anungji ya azüki nung mi senokba maparen dang mesüka lir, kobai tsüngbang aser yangji temulung lema jenoka alir ajak mitsü kümstsütsü shingaia meteta maka. ABAM nung yim ka mejeta shisa tuyur yua maka anosa ABAM ya shinga yim/arogo küboka masü.

ABAM-i 1986 lemeteta ayu, ajisüaka temzüng ka magütsü, aji agi Lemteta akaba ka telemta lemtet ka ama mebilemli; tanü tashi koyimba mesüra koba arogo mesüra nejai ashishitepa ABAM 1986 lemtetba melenshidaktsüba mali. Iba 1986 Lemtetba ya tatem aser ABAM yangji noktaka lir ta Molungkimong aser Molungyimsen Arogo anaprong dangi mapang balala nung ABAM ES-i shiti ajanga jangja zülur yokogo, aser iba arogo anaprongi yangji 'nonga' ta shia noktakba angashia mali.

Tang ABAM nung Molungyimsen akümba kuli mesüra Molungkimong nung tamanger reshikangshi asüba/masüba indang mangatetep kecha angazüka mali, anungji item otsü züluba agi kecha teloka aser shinga mangmangkora masütsü aser tang teptaka akaba keno den kecha sentaktepa maka nungji iba otsü zülutepba agi keno nung tetsükdaktsü kecha malitsü imlar.

Kari ABAM 1986 Lemtet nung 'Nüngdakra zülua aliba kuli o (documents) bushiteptsü' ta lapoktsüa aliba ama kuli tejangja ngutetaka ABAM dangi bener marui lira aji tim masü, kuli miimbanga ayutsü mesüra okadak ang obendangtsü tashi atateptsüji tim masü. Kechiyong ABAM-bo lemteta akaba nung aotsü aser yamaji odar. Ajisüaka tenzüker kari Mungdang lemtet anema pei jurila aibelen lira ajibo Mungdang khuret masü, pa/laji Tsüngrem tenzüker ka asüyonga kin kidong aser yimer lir, ajisüka aji pa/la neja khuret.

ABAM 1986 Telemtetba ya kudasür tenzük tatsü agi reprangdangdi, ABAM central council 1980 telemtetba zünya 42 nung yamai zülua lir "Molungkimong arogo otsü nung koba mangatetep mapang talangka kaa aru ibaji tembanga reprangshitsü atema iba special committee mungdang tenüng nung Mungdang mendenbubai shimteta agütsür. Iba committee yaki tamalen inyaka aliba maparen ajunga shisadanger kechi telemtetba arudir aji tatembang asütsü mungdangi parnok nem tashi ajak agütsür" iba committee nung parnok 17 shimba angur. Iba Special committee tebushitetba 1981 küm tatem mungdangi bener arua agizükba zülua mangur, iba melena 1981 central council telemtetba zünya 61 nung yamai zülua lir "Molungyimsen arogoi kechi temulung masü o arur ibaji reprangtsü atema special committee itemi shimer" ta sür parnok nisung 15 shimtsüba angur. Iba Special Committee tebushitetba 1986 nung bener aru aser kecha arogoia mashishi nungji Mungdangi agizüka ayu, aser tanü tashi shingaia ashishia anema noktaker melenshidaktsüba mali. Ajisüaka tajung kaji "Nüngdakra zülua aliba kuli o (documents) bushiteptsü akok" ta lapoka yutsüba ya junger, küm aika lir ang anguyonga kechiba tang ang angü? ta asütsü mali, ajisüaka shiri documents tejangja ngutetedir ABAM nem tekaraba nung metetdaktsüa temelenshitsü melenshitsü junger, ajisüaka itemji ajak len nungi reprangshitsü mapang agütsürang melenshitsü tim. Küm noklangka süir ang kuli tejangja ka ngutetba agi tamagitsü ta mekümtet, yamaji iba 1986 lemtetba nungsa tenzüker kari miima aibelena linyaka alinunga arogo tsütsüa küm aika süiba agi temeshi mapa ta mekümetet aser alima ozüng tsüngdanga küm 25 shi ayuba agi miima inyakba mapa ka temeshi ta mekümtet, anungji tanü yabo tasür ka süa ali nung arem yongbo iba keno ya akümliri tatem tongtsütsü, kechiyong ABAM nung tang tenzükertem yaa melenteptsü, tasüa asütsü akok, yamaji keno benoker rongnunga item keno metembangjungu arishi aseni yua maka nungji asüama ajurutsüa shingaia meteta maka, ajisüaka akümliri iba keno tembangtsütsü. Tasürji ali nung aremtsü aser akümliriji satoksatoka alitsüla.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

## Kohima Lotha Baptist Arogonung Pastors appreciation day among



October 08, 2023 nü Kohima nung Kohima Lotha Baptist Church (KLBC)-i ayongzükba Pastor's Appreciation Day sentong nung Rev. Zotuo Kiewhuo, Rev. Dr Benri Lotha aser tangartem tangokba noksa nung angur.

**Kohima, Mongputeni/ October 09 (TYO):** October 08, 2023 nü Kohima nung Kohima Lotha Baptist Church (KLBC)-i Pastor's Appreciation Day ayongzükba mongogo; iba anogomong nung pastor temi ano tali bendanga agütsür Tsüngrem tenzüktsü akangjunghitep.

Iba sentong nung tetushi tejaokerji Koinonia Baptist Church (KBC) nung pastor aser Kohima Bible College (KBC) nung Principal, Rev. Zotuo Kiewhuo liasü.

'Pastor: a High calling of God' (1 Timoti 3:1-7) omen nung ajemdaker onük jembidang Rev. Zotuo Kiewhuo-i, pastoral ministry indang lemsatepba den külemi Tsüngrem dang nangzükba mamadoktsü ayongzük, ta Koinonia Baptist Church media ministry-i sangdong ka ajanga metetdaksü.

Rev. Kiewhuo-i, aiben nisungtemi Tsüngremi asenok dang ajungba amadoker, ta ashi.

Laishiba nung Yakob otsü nung ajemdaker tayongzükba agütsüdang pai, Yakob-i Bethel nung tenangzükba agiba nenshia metetdaksüba aser Bethel-i meyipa aoba (Lipok 31:13 aser 35:1) ama pastor temi pei tenangzükba mamadoktsüba aser Tsüngrem den sendaktepa alitsüla, ta metetdaksü.

Paisa Lotha region nung mezüngpur tamanger Khristantemi pei tamang nungi masetshiba lemsatep.

Pastor tem tajaba ya arrshi piyong atema lir; pastor mapa ya pei taküm atema mesüra itasen atema inyakba mapa ka masü, ta pai metetdaksü.

1 Timoti 3:1-7 nung ajemdaker pai pastor tem dak keta alitsü yimya balala metetdaksü; item rongnung ochishia aliba, tenendak aser rongsen mebenpuba densema lir.

Rev. Kiewhuo-i, meimchir ajak dak keta aliba ama pastor tem dak-a metokmeperi lir, angazüktsü atema melunga alitsüla aser tai tesayubatem nem manishidaksütsüla, ta ayongzük.

"Arogoi longjemer pastor tem aser lenirtem atema sarasademtsütsüla (1 Tesalonika 3: 1-2), parnoki miim o metettsü

(Efesa 6: 19). Longjemer maneni sarasademtsüla (Rom 15: 30, Luk 18) koba ajanga sarasadem ajanga tanela nung ajak longjemtsü (Kolosi 2:5)," ta pai lemsatep.

Rev. Kiewhuo-isa Arogo longjema alitsüla, kechiyong iba ya Khrista temang lir, anungji kin nung ajemdaker telesa malitsüla, ta pai ayongzük.

Pai, tamang nung ka asütsü aser telongjem alitsüji kanga tongtibang (T. Mapa 4: 32), ta ashi. Paisa, Khrista osangtajung ya telesa indang masü saka Tebu ka, Tamang ka aser telongjem indang lir, ta metetdaksü.

Kasa sentong nung Rev. Kiewhuo-i Kohima Lotha Baptist Church nung pastor tem aser Arogo züngsemtem atema temeja sarasademja liasü.

Sentong nungsa Koinonia Baptist Church (KBC) men's department chairman, Khriezovolie Suokhrie-i pa tezüngjang 'failure' nungi taküm kümzükba nung ajemdaker taküm kuli lemsatepa liasü.

Iba sentong ya pastor Renthungo Kikon leniba nung agi, deacon Y. Sancho Ovung-i sarasadem, KLBC Adult choir-i ken ka aten aser pastor Dr. K. Benry Lotha-i sentong tembanga sarasadem.

## ANOGO ABEN TSÜNGREM DEN

## Teti aliba yimlibilem

-T. Ken 136:1-9

T. Ken 136 nung Tsüngrem yimlibilem uluba indang ashir, "kechiyong Pa yimlibilem teti alir". Yihuda nunger iba ken teti tekülemdak aten. Putir telok kati ashitsü, "Oh, Kibuba nem tenüngsang agüjang kechiyong pa tajung lir!" (t.1). Idangji Putir telok kati langzüksü, "Kechiyong Pa yimlibilem teti alir".

Yimlibilem aser taochi teti külemi aor. Tsüngremi Pa yimlibilem agi kü dak malangba kü nem agütsür, aser Tsüngremi, Pa yimlibilem nung kü dak alangba magütsür. Pa yimlibilem teti alir, aser asenok telangzübaji tenüngsang agütsüba aser tetushi asütsüla.

Pa tesüngmangtsütem asoshi Kibuba tenüng sangang. "Sayatenya tulu Pa mesüngi dang inyaker, Pa sangang" (t.4). "Pa tenüng Tesüngmangtsü ta ajatsü" (Isa.9:6). Yisu Khristai ashi aser Tesüngmangtsü mapatem inyak. Kodang Tsüngrem taküm ka nung tangshidir, ibai tesüngmangtsü agi asünger. Peter, Andrea, Yakob aser Yohan- Parnoki Yisu majurui dang ali asübo parnok tilar nisung angu purtem dang lila. Parnok Kana yimdak Kiyir benjung kati ao, aser tesüngmangtsü atalok. Parnok tasüdaki ao, aser tesüngmangtsü adalok.

Pa shisatsü asoshi Tsüngrem tenüng sangang "Shiba shisatsü agi anüngtem yanglu Pa sangang" (t.5). Tsüngrem shibai alima ajunga yanglu, ibai azüoktsü Pa shisatsü kar, aser na ne taküm asoshi nüngdak shisatsü Pa kar. "Nenok rongnung kar shisatsü agi anünga lira, Pai Tsüngrem dang meshidakjang" (Yakob. 1:5). Pai na anitsü.

Pa asoshi pa tenüng sangang. "Shibai tzü manung alima sataka yanglu Pa sangang" (t.6). Pa tesüngmangtsü mapatem asoshi asenoki Tsüngrem tenüng sangdi. Asenoki Pa linüba bushidi kechiaser pa shisa taka. Pa teyangluba ajanga Pai agütsüba ajak asoshi Pa tenüng sangdi.

Tsüngremi yimli mebilem asübo aser taochi maka asübo na meküzmzüki lila. Iba sempet ana odang agüjadok ta tagi. Pai na asoshi kechi agütsü iba asoshi nai Pa asangtsü mapang bendanga agütsüdar ma? Aser Pai na asoshi inyakba asoshi pa sangdagi ma ?

## Khrista atema kulisertemi jembiba ama inyaksüla: Rev. Dr Jerry

**October 09, 2023:** World Council of Churches (WCC) general secretary, Rev. Prof. Dr Jerry Pillay-i Khristantem dang, Khrista atema kulisertemi jembiba ama inyaksüla, ta ashi.

Tawa pai India semdanga Christian Conference of Asia senden nung shilem agia liasü.

September 26 nungi October 3 tashi India semdangba mapang nung Pillay-i Kerala kübok Kottayam nung aliba Church of South India Cathedral nung sayutsüngia liasü.

Tsüngrem nüburtem ya Khrista osangtajung sangdongtsü aser jembiba ama mapa agi inyaksü jatetbapurtem lir, ta pai ashi.

"Khristai Tenyaba wadang inyaksü atema Khristantem nem mapa nunglokja lir. Alima nung timtem tuoshi aser tejashi ajak koktettsü atema asenok nem tashi agüja lir. Asenoki Tsüngremi melungba inyakba mapang nung mapang ajak nung Tsüngrem asen den alitsü asenok dang nangzükba lir," ta pai ashi.

"Asia nung Khristantemi WCC atema inyakba ngua ni kanga ajungmeso aser kanga süngmanga liasü," ta Pillay-i metetdaksü.

"Sobaliba temeyoktep aika alidak parnoki Khrista nung ka küma longjemetba ajanga ni kanga ajungmeso. Minorities aser yimsü tsütsü taremsüktep maliba tebilemstü asoshi inyaksü nüngdak," ta pai ashi.



WCC general secretary, Rev. Prof. Dr Jerry Pillay-i Kottayam nung Church of South India Cathedral semdangba mapang tangokba noksa nung angur.

India semdangba mapang nung Pillay-i, Kerala densema tesem aika nung pei aliba tesem toktsür tangaleni oa aliba tebilemstü tulu aliba reprangteta liasü.

Pillai Kerala tonga aoba mapang nung Malankara Mar Thoma Syrian Church in India, Malankara Orthodox Syrian Church, Church of South India aser Jacobite Syrian Orthodox Church densema WCC züngsem Arogotem nungi lenirtemi pa agizükba liasü.

Pillay-i milen ka tsüklokja Christian Conference of Asia assembly tenzüktsüba sülen tetenzük sentong nung jembiba liasü. Okila jembidang Dr. Pillay-i alima nung tebilemstü onük balala lemsatep aser item tebilemstü atema lenla balala

nungi inyaksü ayongzükba liasü.

Yimtenren aser loktiliba tsütsü tebilemstü onüktem aser alima nung taküm amokmerenba tebilemstü balala lenla ajak nungi inyaksü nüngdak, ta pai ashi.

Pillay-isa, alima tatsükba akümba tebilemstü atema Arogo teinyaksü shilem lir, ta jembiba liasü.

Pillay-isa WCC-Christian Conference of Asia South Asia Consultation on Ecumenical Diakonia nungi lenirtem aser Vijayapuram Diocese Conference Centre nung Asian Ecumenical Youth Assembly nung adener lanur 100 shi ajurua liasü.

Paisa Asia nung aliba linük 12 nung WCC züngsem Arogotem nungi shilem agir 40

ajurua jembiba.

Christian Conference of Asia senden nungji o lemtep sentongtem agi, talisa theology, loktiliba aser yimtenren onüktem nung o lemtepa liasü.

Pillay-i Asian Ecumenical Festival nung aden aser Kottayam nung aliba CSI Tenla kidang Tsüngrem O jembiba den külemi South Korea nungi Khristan lenirtem telok ka ajurua liasü.

Pillay-isa Mar Thoma Theological Seminary, Kottayam; Malankara Syrian Orthodox Theological Seminary, Asian Ecumenical Institute, Thomas Mar Athanasius Memorial Research & Orientation Centre aser Orthodox Theological Seminary semdanga liasü.

**AO OSHI ANGAZÜKDAK:**  
**TANÜ ANGAZÜKTSÜBA OJANG**



**Sangsa**

(v) teka agi tilala kümdaktsü ( break into pieces manually)

\* Yisui amtsük sangsa aser nütsüngtem nem lemsaa agütsü.

**Sangshi**

(n) azük nung enokba merang tsüngtsüng tila (bell type metal bead piece used for necklace)

\* Aotsür azük nung sangshi enoka yanglur azüker.

**OLONG PAITEP # 6662**

1		2		3		4	5												
				6														7	
		8																	
9				10		11													
			12															13	
						14													
16																			
						17													

**TIPLÉN**

- 1. Nisung jenti - (5)
- 4. Tsük rudenba - (5)
- 6. Temzüng tesashi - (5)
- 8. S\_\_\_i - (3)
- 9. Nisung rongnung telemsa - (3)
- 10. Anogoshi - (4)
- 12. Ajanga aor - (4)
- 13. Tsük rizüngdak - (3)
- 14. Tebang nungi adokba - (3)
- 16. Süngdong tatembangtiba - (5)
- 17. Meputep - (5)

**LANGTSÜNGLEN**

- 1. Tenük telong - (9)
- 2. Committee dang ajar - (5)
- 3. Yagi ki okdoker - (7)
- 5. Yim lenmang - (5)
- 7. Temoatsü keter meyipa aruba - (9)
- 11. Kanga junga menemba - (7)
- 12. Kenyongi majinü - (5)
- 13. Rong kanga tulu - (5)

**OLONG PAITEP # 6661 TELANGZÜBA**

**TIPLÉN :**

- 1. Aben, 4. Artsü, 7. Lisem,
- 8. Liwa, 9. Sarasadem,
- 12. Aket, 14. Mangu, 15. Anünü,
- 16. Ango.

**LANGTSÜNGLEN :**

- 1. Aruli, 3. Balala, 5. Suwar,
- 6. Belem, 9. Süjak, 10. Aonung,
- 11. Dokan, 13. Tinu.

**NAI-A YA METETTER MA**

**Alima nung linük tilatiba 10 den nütsünyongsük yamai : (Source Internet)**

- 1. Vatican City - 517 people
- 2. Tuvalu - 11,387 people
- 3. Nauru - 12,769 people
- 4. Palau - 18,058 people
- 5. San Marino - 33,644 people
- 6. Monaco - 36,313 people
- 7. Liechtenstein - 39,558 people
- 8. Marshall Islands - 41,952 people
- 9. Saint Kitts and Nevis - 47,745 people
- 10. Dominica - 73,006 people

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimim@gmail.com nung yokang mesüra Tir Yimyim bureau tem nung agüjang.



1. Tenüng : .....  
2. Tasoba anogo: .....  
3. Küm : ..... 4. Class : .....  
5. School : .....  
6. Talidak : .....  
7. Salem osang : .....

**Rahul Gandhi-i Prime Minister**

inyaktsü: Rekibuddin Ahmed

**Guwahati, October 9, 2023**

(Agencies): Taruba Lok Sabha electionnung Prime Minister candidate asütsü atema INDIA bloc nungi osang kecha mali saka Assam Congress MLA Rekibuddin Ahmed-ibo taruba PM ji Rahul Gandhi asütsü ta metetdaksüogo.

Kamrup kübok Boko nung sentong ka nung jembidang Congress-i nisung ajak pelashishia agizütsü ta Ahmed-i ashi

"Nübertemi Congress nung adendang onok pelar aser taruba India Prime Minister ji Rahul Gandhi asütsü" ta pai ashi.

Rajasthan, Chhatisgarh, Madhya Pradesh aser South India nung assembly elections agidang INDIA bloc ajanga takok angutsü ta MLA Ahmed-isa metetdaksü.

Osangbenertemi Assam nung Congress-i koba tashi mapa inyaker ta asüngdangdang "election agitsü ano küm ana ser tesadang ka lir anungji ano sentong merenem" ta pai langzü.

Paisa osangbenertem dang Assam Congress president Bhupen Borah aser tanga spokespersons den osang metetpelatsü ashi.

Indian National Developmental Inclusive Alliance (INDIA) ajanga candidates mesüra menden lemsatepba osag kecha mali saka nisung aikati Rahul Gandhi-i PM inyaktsü ta jembir.

Ajisüaka tang tashi Congress-i state aser national levels nung taruba PM candidate atema osang kecha mesangoktsü lir.

**MENUNGRA BILEMTETER**



Late. Aonungsang (Chuchuyimlang)  
Tasüba anogo: 9th October 2022

Ainjung denari nung pungmang ama nai onok toktsür or küm ka süitema aruaka onok mulungjang nungi kodanga mamateter.

Kechiaser ne temeim, taremsük, tejungnü, tagütsünü, menerem jakden teti onok nüklai arua na onok den ali ama menunrar saka ya asangsang asü na ta longraseta tanü kinungertemi na asüba küm ajungba bilemteter sarasadema amonger.

-Temeim Kinüngtsü, Jabaso, Tsurabur aser kinüngertem.

**Meghalaya CM-i Tipra Motha rallynung adentsü**

**Agartala, October 9, 2023**

(Agencies): Tipra Motha-i October 14 nü lokti sentong tulu ka ayongzüka nung Meghalaya Chief Minister Conrad Sangma-ia adentsü.

Iba sentong ya Tripura Tribal Areas Autonomous District Council (TTAADC) headquarters Khumulwng nung agitsü.

"Tang mezüng atema October 14 nü regional party rally ka ayongzüka nung tanga state ka nungi Chief Minister-i par cabinet minister tem den külemi shilem agitsü" ta taoba Tipra Motha chairman aser chuba jabaso Pradyot Kishore Manikya Debbarma-i ashi.

"Meghalaya Chief Minister



Conrad Sangma

Conrad Sangma aser par cabinet züngsemtemi onok mega rally nung adentsü. Ni nisung ajak dang Khumulwng-i arutsü aser Tiplasa nunger ya tashimait masü aser temeten atema raratettsü ta osang sangoktsütsü ayongzüker" ta Pradyot-i ashi.

**Nieketuno Sechü-i Miss Chümoukedima 2023 takok korang angu**



**Dimapur, October 9, 2023**

(TYO): Nieketuno Sechü-i Miss Chümoukedima 2023 takok korang nguogo aser lai Rs 70,000 senpet agizük.

Iba tetoktepba nung Nieketuno-isa Best Ethnic subtitle takok angu.

Tanabuba jenjang nung Choilung Phom aser tasembuba nung Ruth Chawang nati takok angu. Choilung-i Rs 50,000 senpet den Miss Multimedia aser Miss Queen of Hearts takok angu. Külen, Ruth-i Rs 30,000 senpet den Best Walk sub title agizük.

Iba tetoktepba nung takok angur ajak nem Lisu Care Pure and Natural, Wewe collection, Gutouch, Humtsoe craft, Zenki organic ajanga sempettem agitsü.

Miss Chümoukedima 2023 tetoktepba nung IWSN training institute ajanga evening gown wear aser Mhayani Design ajanga party casual designer wear anepalua liasü. Maneni Achievers Academy coaching institute ajanga takok korang senpet agütsü.

VLCC Femina Miss India Nagaland Lovi Awomi-i tetokteper 14 nem tesayuba balala agütsü aser contestant manager Ralan Patton den külemi yaritep.

Iba sentong nung KL Pamei, Herman's band Noklak, Euli Kinimi, BAMILE Pame aser Ks dance and Fitness Studio ajanga shilem balala agi.

Iba tetoktepba nung Miss Chümoukedima 2022, Miss Earth Nagaland aser Mister

Chümoukedima nungertem aden.

Tetoktepba nung tetendangertemji Dr. Nukshi Esther, Dr Althea Sukhato Wotsa, Sanjeev Tamang, Enyuh Phom aser Mrs. Veineinem Singson Haolai nungertem liasü.

Tesüiba nung Miss Chümoukedima ya Aghatos Society ajanga ayongzüka liasü saka tang nungibo Meraki Entertainment Nagaland kübok ayongzütsü.

Meraki Entertainment Nagaland ajanga Mister Kohima, Mister Dimapur, Miss Kiphire aser Mister Chümoukedima sentongtem ayongzüka arur. MEN ya 2018 küm tentet aser parnoki Naga lanurtem arts aser fashion industry nung ajungkettsü meranger.

### Cameroon yimtiba Yaoundé anentsüh lendong nung nisung 23 asü



**Yaoundé, Mongputeni/October 9 (Agencies):** Cameroon yimtiba nung anentsüh aluba sülen nisung 23 süogo, ta emergency services-i sangdong ka ajanga metetdaksü.

Local radio station kati, iba anentsüh lendong nung nisung 40 süogo ta ashiba den ano nisung aika samar bushiteepdar, ta metetdaksü.

Kasa mapang nung tüzümsüing aruba ajanga tekümsükba maparen nung tetsükdaksü adokdaksüogo aser local temi jana nungi tasümgangtem teka tesa agi dang atsüteta liasü.

Tzünglu kanga sashia aruba

ajanga Mefou ayong Deobarnü moshia ayim tenzüik aser iba ajanga ayong temeket nung aliba tesem aika metsüingogo.

Iba yimti nung küm ka shi tejakdang anentsüh alua nisung 14 asüba sülen tang iba lendong ya atalokogo.

Anentsüh lendong nung Mbankolo kübok sensakertem aliba tesemtem tamajungba kongshiogo, kong nüngküm nung yanglua aliba ki kar chirep aser mongotong tema anenzükur ao.

"Tanürtem tasümgang ali tai nung prokshir liasü," ta iba tesem nung alir kati ashiba Cameroon Voice news website sangdong ka ajanga metetdaksü.

Ajak senteper tasümgang 12 maitsü jangja morgue-i benerogo, ta private Actu Cameroun website-i metetdaksü.

Ki 25 shi tüzümsüing agi apuongerogo aser kibong aika taküm sabanga lir, ta kasa sangdong ajanga metetdaksü.

Honibarnü kidanger Nigeria nung ktdangsürtemi state teku nung alirtem dang kümdangshia alitsü asoshi metetdaksüogo, kechiyong Cameroon-i Lagdo Dam nungi tzü chiok tenzüka liasü.

Tzü ya ita tepeyong chioktsü imlar, ta Nigeria indang National Emergency Management Agency (Nema)-i ashi.

Cameroon-i ashiba agi, linük anütoktiplen tzünglu kanga sashia aruba ajanga dam nungi tzü chioktsüsa kümogo.

Tzü ya takok tashi tera dang chioktsü ta ktdangsürtemi ashi.

Taoba küm dam nungi tzü chiokba sülen Nigeria nung tüzümsüing aruba den nisung taküm dena sama liasü. Tüzümsüing yagi Cameroon den arrtsü nung aliba Benue state tamajungtiba kongshia liasü.

### Office of the Longmisa Senso Mungdang

P.O. Mokokchung-798601. B.P.O. Longmisa Mokokchung :Nagaland.

#### TENÜNGSANG AGÜTSÜR

Dr. Arensungla Pongen. D/o. Mr. Imlisungzung Pongen aser Mrs. Nungshisongla Jamir. Iai Nagaland University kübok Entomology Department nung thesis topic "Integrated Pest Management of Major Insect Pest of Tomato (Solanum Lycopersicum L.)" dak ajemdaker Doctor of Philosophy (Ph. D) Entomology nung takok tajung anguba asoshi LSM ajanga konang nüngsang aser tetushi agütsür.

Tarutsü anogotem nunga Tsüngremi ajungketa takok moajangma ta sarasadema atar.

Sd/- Yashiramok Ao President, LSM



Sd/- Watitoshi G. Secretary, LSM

### Claudia Goldin nem Nobel Prize in Economics Award agütsü

**Stockholm, Mongputeni/October 9 (Agencies):** Women's labour market outcomes dak sendakba nung tangatetba ulushidaksüba atema Claudia Goldin nem Hombarnü Economics nung 2023 Nobel Prize agütsüogo.

"Claudia Goldin indang bushisüingdang ajanga asenok nem labour market nung tetsürtem indang taoba aser

tang shilem tali tejangjaba angatetdaksür," ta Nobel Committee-i sangdong ka ajanga metetdaksü.

Goldin-i, high-income linüktem nung taa agia inyakba mapatem nung tetsürtem asemsü agi timba süaka tetsür aser tebur tsüingda tebandang aliba indang rasa ashiba atema iba naroküm agütsü, ta parnokisa ashi.

Academy indang secretary-general, Hans Ellengren-i taküm iba naroküm agizüker sangdonga liasü.

Goldin ya United States nung Harvard University indang professor ka lir.

Economics nung Nobel Prize angur tetsürtem rongnung Goldin ya tasembula lir. Iba naroküm dang ya Sveriges Riksbank Prize in Economic Sciences ta-a ajar koba Alfred Nobel tenüing nung agütsür. Economic sciences nung naroküm agizük tetsür asem ya Elinor Ostrom, 2009, Esther Duflo, 2019 aser Claudia Goldin 2023 ta lir.

Mezüngbuba Nobel Prize in Economics ya 1969 küm Ragnar Frisch aser Jan Tinbergen na nem agüja liasü. 1969 nungi 2022 küm tashi nung economic sciences atema naroküm 54 agütsüogo.

Banks aser financial crises dak sendakba nung bushisüingdang atema Ben S. Bernanke, Douglas W. Diamond aser Philip H. Dybvig nung nem Sveriges Riksbank Prize in Economic Sciences in Memory of Alfred Nobel 2022 agüja liasü.

Nobel Prize in Economics ya economics luyim nung tangar dang nungi alakteta shilem tajung agiba atema agütsür.

Medicine, physics, chemistry, peace aser literature nung Nobel Prize agütsüba ama masü Nobel Prize in Economics ya 1968 küm nungiang central bank of Sweden, Sveriges Riksbank-i agüja arudar.

Economics nung Nobel Prize ya economics luyim nung bushisüingdang ajanga temelenshi bener arutsüba lokti aser kija nem agütsür.

### Israel-i Gaza ajunga mokdangtsü sangdongogo



**Tel Aviv, Mongputeni/Oct. 09 (Agencies):** Hamas teloki Israel amakba tenzüikba sülen sepaitemi lungbanger aliba Gaza Strip tesem ajunga mokdangtsü ta Israel-i sangdongogo aser iba tenokdangba nung chiyongtsü aser tzü dena lir.

Hamas-i yimsü asüba Gaza nung Hombarnü ktdangsürtemi electricity shibangtsütsü aser chiyongtsü aser totzü yokba ajunga nokdangtsü, ta Israel Defence Minister Yoav Gallant-i ashi, kong nisung million 2.3 shi alir.

Tashiyim amshia amokbanger aliba Gaza Strip nungya 2007 küm June ita nungi Israel-i tenokdangba balala agüja arur. Israel yagi Gaza indang airspace aser tzyüim ajunga aziüoka lir aser ano border crossing points asem aliba nungi ana par kübok lir aser ka ya Egypt kübok lir.

"Onoki Gaza ajunga sapanger... Electricity, chiyongtsü, tzü, gas ajak shibangogo," ta Gallant-i sangdong ka nung ashi.

Honibarnü Hamas telungpuri

Israel tesem balala telungi aita amakba sülen ozü nüburtem aliba tesem ajak ozü tazüokba nung lir, ta Israel indang chief military spokesperson, Daniel Hagari-i Hombarnü osangbener dang ashi.

Arütsü alema aitba nokdangtsü mechi Israel indang tanks aser drones temi atsü sapoka aliba anüker, aser arütsülen aliba yimtsüing 24 rongnungi 15 nungibo nüburtem ainshidaksüogo aser tanüingba ya ghonda 24 tsüingta anizükur aotsü, ta Hagari-i ashi.

Ozü teloki Gaza tesülen maneni rarar aser Hombarnep tashinung Israel nung jenti puogo, ta Hamas odongtar Abdel-Latif al-Qanoua-i osangbener dang ashi.

Israel-i pua aliba Palestine nung ajunga chiokdaksütsü ozü nükjidong lir, ta pai ashi.

Hamas teloki ajungbena amaktsü südi ta Israel itdangiter temi imla maliba aser renema maliba asoshi temolung melemteter. Gaza nung aliba kiralongrar temi amaktsü akok ta aiben tekumdangtsü ashiba

Israel-i züingzunga magizük, ta Egypt itdangiter kati ashi.

Yakta langka tulu kar ataloktsü südi ta Cairo-i Israel nung dang aiben shiogo, ta Egypt ktdangsüri ashi. Israel ktdangsürtem West Bank nung dang rangloker liasü aser Gaza nungi timtem agütsütsü meblem, ta pai ashi.

1973 Yom Kippur rara sülen linük nung tang tesashitiba lendong nung Israel nung 800 dak tema süogo aser yiruba nisung 2,243 yirur lir, aser Israel-i meyiper Gaza nung bomb pokloktsüba mapang Palestine nung 510 dak tema takum samaogo aser 2,800 jungnüa yirur lir.

Ano Hamas teloki Israel nung sepaitem, tantsürtem, tanurtem aser kibong ajema pua aliba ajanga tashi ita tekeraba nung telangzüba agütsütsüsa akum.

Gaza nung Palestine nungertem teti saksalema alir, kong anünglen drones senzüdaksü, arütsülen security tesashi yoka lir aser mitkartem tesem ajaklen alir. Aser Israel

intelligence agency temi osangtsüsang bendentsü asoshi cyber capabilities aser sources balala ayur.

Ajisüaka tang tesüsa Hamas züingsem noklang aika Israel arütsü alema aita amakba ajanga Israel itdangiterba nung tapok aliba ajiteter.

Palestinian Islamist telok Hamas-i Israel amakba nung Iran shilem lir ta aitsüba parnoki Hombarnü magizük. "Iran shilem lir ta tai tongloktsüba ya yimtenren tsütsü kuli kar nung ajemdaker lir. Islamic republic-i kodanga Palestine densema danga linük telemtetba agiba nung shilem magir," ta foreign ministry odongtar Nasser Kanani-i osangbener dang Hombarnü ashi.


Iran yagi Israel magizüker aser 1979 Islamic Revolution mapang nungi par foreign policy nung Palestine nung yaria inyaksangshia arur aser Hamas-i amakba asoshi iba linük ya mezüingbuba sür tenüngsang agüja liasü.

Tehran nungi teyari magie par lonük kumzüka ayutsü aser par temeden tanaben angutsü asoshi nüngdakba tashi Palestine ket nung lir, ta Kanani-i ashi.

Palestine nungeri par kumzüka ayutsü temeden Iran-i bhukumer, ta Tir Ebrahim Raisi-i Deobarnü shia liasü aser region nung lendong adokdaksüba asoshi Israel dak kaotsü, ta tekumdangtsü shia liasü.

Hamas-i Israel amakba sülen Raisi-i Hamas lenir aser Gaza nung amenoka aliba Islamic Jihad telok den jembiogo aser Muslim sorkartem dang Palestine linük bhukumtsü ajungshia liasü.

### PM Modi- Oct 10 nü Asian Games Contingent den sensak asemtsü



**Mongputeni/October 9, 2023 (Agencies):** Tawa tembangbuba Hangzhou Asian Games 2022 nung shilem agiba India nunger asayartem den Ato Kilonser Narendra Modi-i Mongolbarnü sensakasemtsü. Modi-i asayartem den Mongolbarn nikongtsütsü 4:30 shi nung Major Dhyan Chand Stadium, New Delhi nung sensak asemtsü India-i iba asayamung nung

medal 107 nguogo, koba tang tashi nung Asian Games nung medal timtiba anguba lir. Medal 107 rongnung gold medal 28 anguba densema lir. Iba sentong nung Asian Games atema Indian contingent nung asayartem, parnok indang coach tem, Indian Olympic Association nungi ketdangsürtem, national sports federation tem nungi lenirtem aser Ministry of Youth Affairs

& Sports nungi ketdangsürtemi shilem agitsü. Hangzhou Asian Games nung tang India nunger asayartem medal timtiba ngutetba atema Modi-i Deobarnü Indian contingent nem tenüngsang agüja liasü. "India-i otsüsütsüsa Asian Games nung takok tajung ngutetogo. Asayartem taoba küm 60 tsüngda tang timtiba, medal 107 tashi bener aruba ajanga linük ajunga pelateper," ta Modi-i X sabang ajanga tenüngsang agüja liasü. "Asayartem tanen makai bendanga agütsür meranga inyakba ajanga linük nema dangdaksüogo. Parnok takok ajanga asenok nem mapang tajung bilemtettsü atema maongka agütsüogo, asenok ajak ajungmesogo aser temaba jenjang atongtsü atema asenok tali bendanga agütsüshidaksüogo," ta pai shisem.

### NSF Trophy: Red Scars semifinal-i iogo



**Dimapur, Mongputeni/October 9 (TYO):** Tang asaya aliba NSF memorial trophy nung Hombarnü Red Scars Football Club-i 2-0 agi Football for Change (F4C) Academy koka semifinal-i iogo. Iba asayamung ya Angami Students union-i ayongzüka tang Indira Gandhi Stadium, Kohima nung asayadar. Asaya mezüngbuba shilem nung team kati danga goal magütsüteti asaya ajisüaka asaya tanabuba shilem nung Yhunshalo Kemp-i minute 80buba nung Red Scars atema mezüngbuba goal idaksü aser mapang apuloktsür asayaba

mapang paisa tanabuba goal idakja liasü. Asaya nung F4C nungi asayar Letgousang Kipper aser Red Scars nungi asayar Hekato aser Vikethozo nunger nem asayar yimya shitak mebenshiba atema yellow card agüja liasü. Iba asaya atema man of the match naroküm Yhubshalo Kemp nem agüja liasü. Iba naroküm ya taoba ASU aser AYO tir aser taoba MLA Medo Yhokha-i agüja liasü. Mezüngbuba semifinal October 11: New Market vs Liangmai FV; 5 PM.

### Kiptum-i marathon asemtepba nung otsü tasen yanglu

**Mongputeni/October 9, 2023 (Agencies):** Kenya nunger Kelvin Kiptum, shiba taoba küm iba mapang tashi nung marathon khen danga masemi liasü pai Deobarnü Chicago Marathon nung 2:00:35 nung alizüng tongteta world record ka yangluogo. Taoba küm September ita Kenya nunger asayarsa Eliud Kipchoge-i Berlin Marathon nung alizüng 2:01:09 nung tongteta otsü tasen ka yanglur liasü saka tang Kiptum-i second 34 agi takaraba alizüng tongteta otsü tasen ka yangluogo. Chicago course ya World Athletics Platinum Label marathon ka lir aser idaki tetsürtem asemtepba nunga asayartem alizüng kanga kara tongtetogo. Deobarnü tetsür asemtepba ya Dutch tsür Sifan Hassan-i 2:13:44 nung alizüng tongteta koka liasü. Tigst Assefa-i taoba ita 2:11:53 nung

alizüng tongteta otsü tasen yangluba sülen tetsü marathon puti otsü nung alizüng takaratiba tongtetertem rongnung Sifan ya tanabuba jenjang nung lir. Ajisüaka Deobarnü asemteper ajak dang nungi Kiptum-i tajungba asayaogo aser pai asemtepba ya minute asem ser tesa dangshi agi koka liasü. Tanabuba jenjang nung Kenya nunger asayar defending champion Benson Kipruto liasü shibai alizüng 2:04:02 nung tongtet aser tasembuba jenjang nung Somalia nung asosang Belgium nunger asayar Bashir Abdi (2:04:32) liasü. "Ni kü jakdang anütsü nung mapang angu aser ni kanga pela liasü," ta Kiptum-i ashi. "Ni course record yangluogo ta meteta liasü saka tanü ni world record yanglutsü ta bilema maliasü. Ajisüaka ni künübosa world record yanglur

ka akümsü ta meteta liasü," ta paisa shisem. Kiptum ya half marathons aser 10,000m races nung dang shilem agia liasü saka taoba küm December ita Valencia nung mezüngbuba marathon nung shilem agi. Iba asemtepba nung pai alizüng 2:01:53 nung tongteta takok angu. April ita London Marathon nunga pai alizüng 2:01:25 nung tongteta alizüng takaratiba tongtetertem rongnung tanabuba asayar aküm. Tang agi tasembububa Chicago nung tebur world record yangluogo aser Morocco nunger Khalid Khannouchi-i 1999 küm otsü tasen ka yangluba sülen tang mezüngbuba otsü tasen yangluogo. Taoba mapang Kipchoge (2:01:09, 2022) aser Kenenisa Bekele (2:01:41, 2019) natia Chicago nung otsü tasen yanglua liasü.

### ICC World Cup: Gill Afghanistan dena masayatettsü

**Mongputeni/October 9, 2023 (Agencies):** Australia den Deobarnü Chennai nung asaya nung shilem magitetba sülen India team nung opener Subhman Gill maneni taruba asaya Afghanistan den asayatsü aliba nunga shilem magitettsü, ta BCCI-i metetdaksü. Pa Dengue agi shirangba ajanga mezüngbuba asaya nung shilem magitet aser tanabuba asaya nunga shilem magitettsü. "India team nung batter Shubman Gill October 9 nü team den külemi Delhi-i maotsü. Opening batter shiba ICC Men's Cricket World Cup 2023 nung India team mezüngbuba asaya Australia den Chennai nung asayaba mapang masayateti liasü aser taruba asaya Delhi nung October 11 nü Afghanistan den asayatsü aliba nunga masayatettsü," ta BCCI-i sangdong ka ajanga

metetdaksü. "Pa medical team tawabangba kübok Chennai nung dang mongzüka atatsü," ta kasa sangdong ajanga metetdaksü. Australia den asaya nung Gill melena Ishan Kishan asaya, koba India-i wicket trok agi kokogo. Iba asaya nung Kishan, Rohit Sharma aser Shreyas Iyer nungeri run kaka danga meyangluteti out süa liasü. Ajisüaka KL Rahul aser Virat Kohli nati kanga süngjemshir asaya-a team jenjang junga kümdaksü aser asaya akok. Tena senteper run 165 yanglua liasü. Küm tsüngda arishi küm 24 tain Gill-i kanga junga asaya arudar aser taküm pai tang tashi nung ODI century pongu yanglua lir. Pai küm tepeyong kanga junga asaya arudar aser India team World Cup akoktsü atema merandangba nung pai tongtibang shilem agitsü imlar.

### Euro 2028 asayatsü atema stadium ter sangdongogo

**Mongputeni/October 9, 2023 (Agencies):** 2028 küm European Championship atema amshitsü asoshi Britain aser Ireland nati stadium 10 sangdongogo, ajisüaka Bodhbarnü benokba bit nung Manchester United indang Old Trafford aser Liverpool indang Anfield stadium densema mali. England, Ireland, Northern Ireland, Scotland aser Wales football association temi benokba stadium tem rongnung Wembley Stadium, Tottenham Hotspur Stadium aser Cardiff indang Principality Stadium densema lir. UEFA-i, Turkish Football

Federation-i 2028 mesüra 2032 küm Euro ayongzüka asayatsü atema aser Italian Football Federation-i 2032 küm iba asayamung ayongzüka asayatsü atema bit asüba jangjatsüogo. Iba asayamung anaprongla ayongzüka asayatsü asoshi UEFA Executive Committee-i October ita telemtetba agitsü, ta UEFA-isa metetdaksü. Britain aser Ireland-i ashiba agi, parnoki bid asüba yagi iba asayamung jenjang tasen ka dangi ajungkettsütsü aser iba ya Euro 2028 atema "world-class stadia concept tailor-made" lir ta ashi.

"Nisung aika asema nungtugu football ground aser state-of-the-art venues tasentem ajanga ajak dang tuluba aser senotsü timtiba aazükba UEFA Euro ayongzüka asayatsü atema sabang tajung agütsütsü," ta parnoki ashi. Tanga stadium tem rongnung Manchester City indang Etihad Stadium, Everton indang new waterfront stadium, Newcastle indang St James' Park, Villa Park, Glasgow nung Hampden Park, Dublin nung Aviva Stadium aser Belfast nung Casement Park densema lir.

### November 7 nungi... (Tapak 3 nungi...)

Chhattisgarh nung shilem ana lemsar vote agütsü, nominations atema tatembangbuba anogoji October 20 asütsü, tenüng agientsü atema tatembangbuba anogoji October 23 asütsü, November 7 aser November 17 nü election agitsü aser December 3 nü vote azüngtsü. Madhya Pradesh nung nominations atema tatembangbuba anogoji October 30 asütsü, tenüng agientsü atema tatembangbuba anogoji November 2 asütsü, Nov. 17 nü election agitsü aser December 3

nü vote azüngtsü. Rajasthan nung nominations atema tatembangbuba anogoji November 6 asütsü, tenüng agientsü atema tatembangbuba anogoji November 9 asütsü, November 23 nü election agitsü aser December 3 nü vote azüngtsü. Telangana nung nominations November 10 tashi asütsü, tenüng agientsü atema tatembangbuba anogoji November 15 asütsü, November 30 nü election agitsü aser December 3 nü vote azüngtsü.

**BILEMDANGANG**  
 "Tesüngjem nisungi pei meketa alirtem tesunep nung toktsür."